

de que suso faze mençion, e se contiene, e sy nesçesario es por la presente, desde agora lo resçibo e he por resçebido al dicho ofiçio, e a la posesion e casy pose[sion] del, e de lo do poder e facultad para usar del, e lo exerçer, por quanto mi merçed e deliberada voluntad es que lo sean dicho, se faga e cunpla e guarde asy, e los unos ni los otros no fagades ni fagan ende al por alguna manera so pena de la mi merçed e de priuacion de los ofiçios e confiscacion de todos sus bienes de lo que lo contrario fiziedes para la mi camara e fisco, e demas [mando al ome que v]os esta mi carta mostrare que vos enplaze que parescades ante mi en la mi corte, doquier que yo sea del dia que vos enplazare fa[st]a quinze dias primeros syguientes so la dicha pena a cada uno de vos a dezir por qual razon no se cunple mi mandado, e mando so pena de la mi merçed e de diez mill marauedis para la mi camara a qualquier escriuano publico que para esto fuere llamado, que de ende al que vos la mostrare testimonio sygnado con su signo porque yo sepa en como se cunple mi mandado.

Dada en la noble villa de Valladolid a çinco dias de nouienbre, año del nacimiento del nuestro Señor Jhesuchristo de mill e quatroçientos e çinquenta e tres años. Yo el rey. Yo Bartolome Sanches de Badajos, la fize escreuir por mandado de nuestro señor el rey.

330

1453-XI-12. Valladolid.—*Juan II manda al concejo de Murcia que sigan teniendo por corregidor a Diego García de Villalobos durante el tiempo de su prórroga.* (A.M.M., Caja 1, núm. 111.)

Yo el rey, enbio mucho saludar a vos los mis regidores e jurados de la çibdad de Murçia, como aquellos de quien fio.

Fago vos saber que vi las petiçiones que me enbiastes con Rodrigo de Cascales, mi regidor desa çibdad, çerca de lo que toca a la prorrogacion que yo le fize del corregimiento della al bachiller Diego García de Villalobos, mi corregidor enesa dicha çibdad, e aquellas entendidas, por quanto yo entiendo ser asy conplidero a mi seruicio, e a pro e bien comun desa dicha çibdad, mi merçed es quel este enella durante el tiempo de la prorrogacion que le yo asy fize, e aquel conplido yo entiendo mandar, çerca dello lo que entienda ser conplidero a mi seruicio, e a bien desa dicha çibdad, e de los vezinos e moradores della, e por cosa alguna no cunple, que enello se tenga otra manera, ni fagades ende al.

Dada en la noble villa de Valladolid a doze dias de nouienbre, año de LIII. Yo el rey. Por mandado del rey. Relator.

